

Transkription von Urkunde QBD 1358a

Ort, Datierung: Quedlinburg, 1358-08-03

Signatur: Stadtarchiv Quedlinburg, Abt. III, 55

Inhalt: Agnes III. von Schraplau, Äbtissin zu Quedlinburg: Verzichtserklärung gegenüber der Stadt Quedlinburg

Wÿ agnete van der gnade goddes Ebdissche des werliken goddeshuses to Quedelingheburch Bekennen . vnde betughen / openbare in disseme iegenwordigen briue alle den de on seen eder horen lesen . dat wÿ noch alle vnse nako/melinghe nene heren noch nenerleye herscop scullen noch en willen teen bouen de stad noch boue(n) / den Rad to Quedelingburch an nenen stucken noch in gheistliker noch in werliker achte . et scheghe / dat we vervnrechtet worden eder de vnsen . et were an tinse an pleghe eder van welker sake dat to/queme dat sculle wÿ vnde de vnsen dwingen met rechte sunder verdecchnisse der stad vnde des / Rades Vortmer bekenne wÿ dat alle vnwille den wÿ hebben ghehat met deme rade de is vruntlik / bericht Ok bekenne wÿ dat wÿ vnde vnse nakomelinghe nen ghesinde heghen noch halden wille(n) . / weder de stad noch weder den Rad to Quedelingheborch des wÿ to rechte nicht vermoghen wene wÿ / auer to rechte vermoghen des recht scal men von om nemen . Vortmer vor hern Hinrike van / hasseuelde vnde . Nicolawese van heÿmborch de de Rad to Quedelingheburch ver louet heft en / wille wÿ nicht bidden . noch vp vnsir borch noch in vnseme behalde weder de stad vp oren scha/den noch halden noch heghen . Dat alle desse vor ghescreue(nen) stücke van vns vnde vnsen nako/melingen stede vnde gantz werden ggehalden . Des hebbe wÿ dissen brif besegelt met / vnseme an hanghenden Inghesegele . Hir ouer sint ghe west de Edelen heren her Busse de / Jûnghere van Scrapeleue Ridder ¹ her wlr(ik) van Querinuorde Vnde her Bernd van / Meÿnerczom Vnde ok mest(er) Jan van Marburch de de domheren sin to Meÿdeborch Vnde her Lÿp/polt van werle de Archidiaken is ouer den ban to Quedeling(heburch) Vnde her Hinr(ik) van Ballenstede / Vnde de Rad to Halb(e)r(stad) Herme(n) orsleue vnde Tÿle scoffel vnde Cûrd hûter Vnde ok de Rad to / asschersle(ue) . albertus vnde hans woldere(n)k vnde ander vele guder lude . Dÿt is ghe schin Na goddes / bort drytteinhundert Jar in deme achten vnde veftighesten Jare Jn sente stephens daghe des . / hÿlghe mertelares alse he ghewûden wart

¹ Verschreibung von Vnde